



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

ZL.Anr.20/2025

PANELI ZGJEDHOR PËR ANKESA DHE PARASHTRESA (PZAP), i përbërë nga gjyqtarët : Skender Çoçaj kryesues, Arsim Hamzaj dhe Kymete Kicaj, anëtarë, duke vendosur përkitazi me ankesën e Bashkim Fazliu kandidat i pavarur, parashtruar kundër Vendimit Nr.01/2348/2025 të datës 06.09.2025 të Komisionit Qendror të Zgjedhjeve, për Miratimin e Rekomandimit të përbërjes së Këshillave të vendvotimeve të Rregullta dhe me Kusht, për Zgjedhjet Lokale, që do të mbahen më 12 Tetor 2025, në seancën e panelit të mbajtur me datë 10.09.2025, merr këtë:

V E N D I M

REFUZOHET E PABAZUAR ankesa ZL.Anr.20/2025 e datës 08.09.2025, e parashtruar nga Bashkim Fazliu kandidat i pavarur, me të cilën ka kërkuar që të obligoj KQZ, që të anuloh vendimin Nr.01/2348/2025 datë 06.09.2025 të Komisionit Qendror të Zgjedhjeve, për Miratimin e Rekomandimit të përbërjes së Këshillave të vendvotimeve të Rregullta dhe me Kusht për Zgjedhjet Lokale, për Zgjedhjet Lokale, që do të mbahen më 12 Tetor 2025.

A r s y e t i m

Me datë 08.08.2025, PZAP-i, ka pranuar ankesë nga Bashkim Fazliu si kandidat i pavarur, parashtruar kundër Vendimit Nr.01/2348/2025 të datës 06.09.2025 të Komisionit Qendror të Zgjedhjeve, për Miratimin e Rekomandimit të përbërjes së Këshillave të vendvotimeve të Rregullta dhe me Kusht, për Zgjedhjet Lokale, që do të mbahen më 12 Tetor 2025.

Në ankesë ndër të tjera thuhet se me datë 08.09.2025, përmes viberit ka pranuar formulën për anëtarë të KVV-së, për Zgjedhjet Lokale në Ferizaj.

Më tej parashtruesi i ankesës thekson se si subjekt politik i janë ndarë vetëm 2 vende nga 616 vendeve gjithsej, që në përqindje i bjen 0.32%. Dmth një ndarje nënçmuese dhe qesharake, njëkohësisht edhe diskriminuese. Ndërsa ka subjekte tjera të cilave u janë caktuar 30 anëtarë (URA) dhe 20 anëtarë Vatra, ndërsa nuk janë në Asamble e as Kuvend të Kosovës.

Sipas parashtruesit të ankesës me këtë ndarje diskriminuese është shkelur neni 74 paragrafi 1 dhe 76 paragrafi 2 i Ligjit për Zgjedhje të Përgjithshme nr. 08/L-228. Andaj kërkoj ndarje të barabartë të vendeve të mbetura për subjektet politike jo-anëtare të Kuvendit, 52 vende të ndahen barabartë.

Parashtruesi në ankesë ka bashkangjitur listën për miratimin e rekomandimit për Emërimin e Anëtarëve të Komisioneve Komunal të Zgjedhjeve-KVV.

Në përgjigje në ankesë KQZ-ja sqaron se gjatë vendimmarrjes për përbërjen e Këshillave të Vendvotimeve të Rregullta dhe me Kusht ka marr për bazë nenin 64 paragrafi 2.10, nenin 75,76 dhe 77 të Ligjit Nr.08/L-228, për Zgjedhjet e Përgjithshme në Republikën e Kosovës, si dhe nenin 2 paragrafi 2, 3 dhe 43 neni 3 paragrafi 1, paragrafi 2, nën paragrafi 2.1. dhe 2.2, paragrafi 1,2,3 dhe 4 dhe neni 3 paragrafi 1,2 nën paragrafi 2.1 dhe 2.2 të Rregullores Zgjedhore Nr.11/2024 Këshillat e Vendvotimeve.

Pretendimet e palës ankuese se vendimi i KQZ, nr. 01/2348-2025, për Miratimin e Rekomandimit për Përbërjen e Këshillave të Vendvotimeve të Rregullta dhe me Kusht për Zgjedhjet Lokale në Republikën e Kosovës, që do të mbahen më 12 tetor 2025 se ndarja e KVV në komunën e Ferizajt është diskriminuese ndaj tij pasi që janë caktuar vetëm 2 anëtar të KVV-ve.

Pretendimet e palës ankuese janë të pa bazuara për arsyeje se KQZ gjatë ndarjes së vendeve në Këshillat e Vendvotimeve është mbështetur në nenin 3 paragrafi 1 Rregullores Zgjedhore Nr.11/2024, për Këshillat e Vendvotimeve, sipas të cilit përfaqësimi në KVV u takon:

Subjektet politike që kanë kaluar pragun zgjedhor në zgjedhjet e fundit nacionale kanë të drejtë të përfaqësohen me nga një anëtar në KVV .

Kandidati i pavarur i zgjedhur Kryetar Komune në zgjedhjet e fundit, në rast se garon sërish, ka të drejtë të përfaqësohet me një anëtar në KVV.

Komisioni Qendror i Zgjedhjeve, sipas nevojës, mund ta rrisë ose ta zvogëlojë numrin e anëtarëve të KVV-së deri në dy (2) anëtarë në KVV.

KVV reflekton strukturën e anëtarëve të Komisionit Komunal të Zgjedhjeve (KKZ).

Edhe në rastin kur kjo është realizuar, KQZ ka vazhduar duke marr për bazë kriteret tjera:

KQZ, në bazë të formulës përkatëse, përfshin edhe subjektet politike të përfaqësuara në Kuvendin e Komunës, duke u bazuar në përqindjen e votave të fituara .

Nëse nuk arrihet të plotësohet numri prej pesë (5) anëtarësh në KVV, KQZ mund të kërkojë nominime plotësuese nga subjektet politike të certifikuara ne zgjedhjet qe planifikohen te mbahen (12 Tetori).

KKZ ka të drejtë t'i rekomandojë KQZ-së për nominimin e personave me përvojë në proceset zgjedhore, në rast se numri i anëtarëve të KVV-së nuk plotësohet.

KQZ ka marrë për bazë edhe paragrafin 4 të nenit 77, të Ligjit për Zgjedhjet e Përgjithshme, i cili i jep kompetencë KQZ që pavarësisht paragrafit paraprak të këtij neni, në rast se kërkohet, KQZ ka kompetenca për të emëruar sipas zgjedhjes së saj anëtarët e KW-ve të cilët nuk përmbushin kushtet sipas këtij neni.

KQZ, kandidatit të pavarur, Bashkim Fazliu në komunën e Ferizajt i ka ndarë 2 anëtar të KVV-ve. KQZ në këtë rast në kuadër me qellim të gjithë përfshirjes i ka ndarë dy anëtar të KVV-ve kandidatit të lartcekur edhe përkundër faktit se nuk i përmbush kriteret e kërkuara me aktet e KQZ.

Ndërsa sa i përket pretendimit në lidhje se duhet të jetë i barabartë me subjektin politik VATRA e Cila kandidon me 10 anëtar për kuvendin e komunës dhe iniciativën qytetare URA e Cila po ashtu kandidon me 10 anëtar për kuvendin e komunës nuk qëndron për faktin se rregullorja nr. 11/2024, neni 3 paragrafi 5 i jep hapësirë KQZ që "nëse nuk arrihet të plotësohet numri prej pesë (5) anëtarësh në KVV, KQZ mund të kërkojë nominime plotësuese nga subjektet politike të certifikuara".

Paneli, pas shqyrtimit të ankesës së parashtruar nga ankuesi, gjeti se :

-Ankesa është e pabazuar.

Paneli e vlerësoj lejueshmërinë e ankesës dhe ka ardhur në përfundim se e njëjta i plotëson kushtet e përcaktuara me nenin 77 paragraf 5 të Ligjit për Zgjedhjet e Përgjithshme, dhe nenin 4 të Rregullores Nr.01/2025, për Procedurat e Parashtrimit dhe Vendosjes së Ankesave.

Pretendimet e palës ankuese se Vendimi Nr.01/2348/2025 të datës 06.09.2025, për Miratimin e Rekomandimit të përbërjes së Këshillave të vendvotimeve të Rregullta dhe me Kusht, se KQZ me vendimin e kontestuar ka bërë diskriminim në ndarjen të këtyre vendeve ku si subjekt politik i'u janë caktuar vetëm 2 anëtarë, dhe si i tillë është në kundërshtim me Ligjin për Zgjedhjet e Përgjithshme në Republikën e Kosovës, Paneli i vlerësoj si të pabazuara për faktin se me dispozita ligjore janë përcaktuar qartë përbërjet dhe funksionet e KVV, ku shprehimisht dispozita e nenit 77 par.3 i Ligjit për Zgjedhjet e Përgjithshme, parasheh se *“Kryesuesit e këshillave të vendvotimeve zgjidhen në mënyrë të barabartë në mesin e katër (4) subjekteve politike të certifikuara që kanë fituar numrin më të madh të votave për Kuvendin e Kosovës gjatë zgjedhjeve të fundit në atë komunë”, ndërsa paragrafi 4 i këtij neni thekson se “pavarësisht paragrafit paraprak të këtij neni, në rast se kërkohet, KQZ-ja, ka kompetenca për të emëruar sipas zgjedhjes së saj anëtarët e KVV-ve, të cilët nuk i përmbushin kushtet sipas këtij neni”.*

Bazuar në të lartcekurat paneli vlerëson se KQZ ka bërë shpërndarjen e KVV-ve në vendvotimet e rregullta, me kusht në bazë të kriterëve dhe kushteve të përcaktuara me ligj dhe aktet nënligjore ku ndarja është bërë duke trajtuar në mënyrë të barabartë për të gjitha subjektet politike në mënyrë që kjo përfshirje të reflektoj pjesëmarrjen e barabartë për te gjithë ata që marrin pjesë në procesin zgjedhor.

Përfundimisht paneli nga PZAP ka gjetur se KQZ-ja ka vendosur në mënyrë të drejtë dhe të barabartë për të gjitha subjektet politike, duke u bazuar në dispozitat ligjore në fuqi, si për subjektet që kanë fituar numrin më të madh të votave në zgjedhjet e fundit, e po ashtu edhe për të gjitha subjektet tjera pjesëmarrëse dhe se mbi këtë arsye të njëjtave nuk iu është bërë ndonjë padrejtësi me vendimin Nr.01/2348/2025 të datës 06.09.2025 për Miratimin e Rekomandimit të përbërjes së Këshillave të vendvotimeve të Rregullta dhe me Kusht në këtë kontekst duhet pasur parasysh edhe dispozitën ligjore nenin 77 par.4 të LZP-së e cila i jep të drejtë KQZ-së, për të emëruar anëtarë të KKV sipas zgjedhjes së saj, pa marrë parasysh numrin e votave të fituara në zgjedhjet e fundit.

Prandaj, nga arsyet e paraqitura më lart dhe në pajtim me nenin 13 paragrafi 2 të Rregullores së PZAP-it Nr.01/2025, për Procedurën e Shqyrtimit dhe Vendosjes së Ankesave, si dhe nenit 118 paragrafi 1 i Ligjit për Zgjedhjet e Përgjithshme në Republikën e Kosovës, Paneli vendosi si në dispozitiv të këtij vendimi, duke i refuzuar ankesën si të pabazuar.

PANELI ZGJEDHOR PËR ANKESA DHE PARASHTRESA

ZLA.nr.20/2025 datë 10.09.2025



KËSHILLA JURIDIKE : Kundër këtij vendimi është e lejuar ankesa sipas nenit 118 paragrafi 4 të Ligjit Nr. 08/L – 228 për Zgjedhjet e Përgjithshme në Republikën e Kosovës, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimit të këtij vendimi.